



Ս Փ Յ Ո Ւ Ռ Ք Ո Ւ Մ

ԲԵԶՄԵՎԵՍՏԵԿ ՈՒՍՈՒՑԻՉԸ

Հուլիսին լրանում է սփյուռքահայ բազմավաստակ ուսուցիչ, անխոնջ կրթական մշակ և դաստիարակ Գրիգոր Պողարյանի մանկավարժական և հասարակական գործունեության 40-ամյակը:


Վաստակավոր և կրթանվեր ուսուցչի և մտավորականի հորելյանը նշում են նրա բազմաթիվ աշակերտները, գրչի ու գաղափարի ընկերները, ինչպես նաև հայ մամուլը՝ հարգանքով և երախտագիտությամբ:

Գրիգոր Պողարյանը սրտառուչ և գերազանց տիպարն է հայ ուսուցչի և դաստիարակի, և նա երկար կապրի իր ուսանողների հիշողության մեջ որպես այդպիսին:

Գրիգոր Պողարյանի մոտ ուսուցչությունը տարերք է: Նա ծնվել է որպես ուսուցիչ, ինչպես մի ուրիշը ծնվում է որպես բանաստեղծ կամ արվեստագետ: Եվ պատահական չէր, որ նա իր ամբողջ գիտակցական կյանքը, անսպառ եռանդը, բազմակողմանի և խոր գիտելիքները, առանց մնացորդի, նվիրել է Սփյուռքում և հատկապես Սիրիայում և Լիբանանում հասակ նետող հայ նոր սերունդի հայադրոշմ դաստիարակության գործին:

Հազարների է հասնում թիվը նրա աշակերտների, որոնք մեր մեծասքանչ լեզվի քաղցրությունն ու ճաշակը, հայ մշակույթի և դպրության սերը, հայրենասիրության իրավ զգացմունքը, Հայ Եկեղեցու և մեր հոգևոր արժեքների նկատմամբ պաշտամունքն ու նվիրվածությունը ստացել են Գրիգոր Պողարյանից:

Այսօր, նրա շնչի ու նայվածքի տակ կրթված, դաստիարակված շատ երիտասարդներ, Սփյուռքում պատասխանատու և ղեկավար դիրքեր են գրավել հայ կյանքում, որպես ուսուցիչ, գրող, արվեստագետ, հասարակական գործիչ և հոգևորական:



Գրիգոր Պողարյանը քսաներորդ դարի երկրորդ կեսի հայ մանկավարժության և դպրոցավարության պատմության մեջ իր ուրույն տեղն է գրավում մեր մեծանուն այլ մանկավարժների կողքին:

Բազմավաստակ ուսուցիչ Գրիգոր Պողարյանը ծնվել է 1897 թվականին Այնթապում, ուր և ստացել է իր նախնական կրթությունը Վարդանյան կրթարանում, ապա իր ուսումը կատարելագործել Կիլիկյան ճեմարանում, ընդմիջտ իր կյանքն ու գործունեությունը կապելով մանկավարժական աշխատանքների հետ: Երկար տարիներ նա Լիբանանում և Եգիպտոսում վարել է Ազգային Միության և Հայկական որբանոցի քարտու-

ղար-ուսուցչի պաշտոնը, մինչև 1926 թվականը, երբ հրավիրվել է Հալեպ, որպես Այնթապցիների կրթասիրաց երկսեռ վարժարանների ուսուցիչ և ապա տեսուչ, պաշտոն՝ որը վարել է նա ձեռնհասորեն և փայլուն արժանավորությամբ, մոտ 25 տարի: Գրիգոր Պողարյանը միաժամանակ գործուն մասնակցություն է ունեցել Հալեպի ազգային-եկեղեցական կյանքում՝ որպես Ազգային վարչության, Ուսումնական խորհրդի, Ազգային գավառական ժողովի, Հայկական Բարեգործական Ընդհանուր Միության կրթական հանձնաժողովի, Հայկահայհայ ուսուցչական միության և այլ ուսանողական, բարեսիրական, հայրենասիրական, հայրենակցական միությունների անդամ, նախագահ, կազմակերպիչ և դասախոս:

Գրիգոր Պողարյանը ուսուցչական, մանկավարժական և հասարակական գործունեության հետ միաժամանակ զբաղվել է նաև գրական-բանասիրական աշխատանք-

ներով: Ուսումնասիրել է Այնթապի գրագրերը և Այնթապի կորած գավառաբարբառը: Միաժամանակ նա աշխատակցել է բազմաթիվ առաջադիմական թերթերի՝ կուռ և բովանդակալից հոգվածներով, ուսումնասիրություններով և ակնարկներով:

Միշտ անթառամ կմնա աշակերտների հարախտագետ սրտերում բազմավաստակ ուսուցչի, դաստիարակ-մանկավարժի և հասարակական գործչի, ինչպես նաև ազնիվ ու հայրենասեր հայ մարդու՝ հոբելյար Գրիգոր Պողարյանի պայծառ կերպարը:

Գրիգոր Պողարյանի մանկավարժական, կրթական, հասարակական գործունեության 40-ամյակի ուրախ առիթով, նրա մոտիկ և հեռավոր բազմաթիվ աշակերտների սրտագին մաղթանքն է, որ սիրելի հոբելյարը երկա՛ր, դեռ երկա՛ր ապրի, շարունակելու իր շնորհակալ գործունեությունը հօգուտ հայ դպրոցի, մեր մշակույթի և մեր ժողովրդի:

